

八旗通志初集卷之一百二十九

宗室王公列傳一

禮親王代善

原封吳親王滿達海

子貝勒常阿岱
孫奉恩將軍席倫圖

康親王傑書

父追封親王祐塞
子康親王椿泰
兄郡王精

穎親王薩哈廉

順承郡王勒克德渾

原封順承郡王勒爾錦

弟順承郡王諾羅布

謙郡王瓦克達

輔國公馬瞻

八旗通志
卷一百二十九

正紅旗和碩禮親王代善。

太祖高皇帝次子也。生而英毅。智勇過人。從征哈達。輝發。葉赫等國。論功封爲貝勒。丁未年。以瓦爾喀蜚攸城人。苦烏喇國布占泰貝勒之虐。乞移家歸附。代善與舒爾哈齊貝勒。洪巴圖魯貝勒。及一等大臣費英東。扈爾漢。轄率兵三千往徙之。乘夜陰晦而行。見大纛。之上有光。衆以爲異。捫視。無有。復樹之。光如初。舒爾喀齊貝勒疑爲凶兆。欲回兵。代善與洪巴圖魯貝勒並決意進兵。遂至蜚悠城。盡收環城屯寨凡五百戶。令扈爾

漢轄率兵三百衛之先行。布占泰發兵萬人邀諸路。次日代善與洪巴圖魯諸貝勒至。策馬奮怒。率勵軍士進擊。衆軍士皆奮勇願効死。遂渡河。代善與洪巴圖魯貝勒各率兵五百分二路緣山奮擊。烏喇兵遂敗。代善追及烏喇統兵貝勒博克多。從馬上左手攫其胄而斬之。時天氣晴明。忽陰晦。大雪寒冽。被傷敵兵棄甲逃者甚衆。是役也。陣斬博克多貝勒父子。生擒常住貝勒父子及胡里布貝勒。斬三千級。獲馬五千匹。甲三千副。

太祖嘉其功。賜名古英巴圖魯。癸巳年九月。烏喇國布占泰貝勒復背盟。代善隨

太祖統大兵征之。布占泰率兵三萬。越伏爾哈城而軍。時領兵諸貝勒大臣欲戰。

太祖欲復加申諭。未忍加兵。代善曰。所慮者無計令布占泰出城耳。今彼兵旣在平原曠野。舍此不戰。何故興兵而來。厲兵秣馬。亦無用矣。今士飽馬騰。列陣在此。當決戰也。

太祖曰。爾等欲戰。卽戰可也。時諸貝勒大臣及軍士皆踴躍。遂進兵。烏喇兵大敗。十損六七。餘皆棄兵

甲四散而遁。我兵乘勢奪門。遂克其城。布占泰率敗兵不滿百人。急回城下。見城陴悉樹我軍旗幟。大驚而奔。代善統精兵截戰。布占泰勢不能敵。遂遁。又損兵過半。餘皆大潰。布占泰僅以身免。天命元年。

太祖正大號。叙羣臣功。封和碩大貝勒四人。以代善爲首。四年三月。明大發兵四路來侵。達爾漢轄率兵先行。代善率兵二千繼之。遇明遊擊喬一琦兵。擊破之。擒一琦。六年七月。鎮江城中軍陳萬策。與居民潛通於明將毛文龍。令別堡之民詐

稱兵至。大呼噪。城中驚擾。萬策乘亂。執城守遊擊佟養正。殺其子豐年。并從者六十人。叛投毛文龍。

太祖聞之。命代善率兵三千。遷鎮江沿海居民於內地。十一年八月十一日。

太祖龍馭上賓。代善及子岳託。薩哈廉。共作議書詣朝。以書示大貝勒阿敏等。言推戴

太宗文皇帝嗣統。衆皆喜。

太宗讓至再三。衆議堅不可却。然後

從之。十一月奉

命率精兵萬人往征蒙古喀爾喀扎魯特部落。執巴克貝勒與其二子。及喇什希布代青桑噶爾寨等十四貝勒。殺吳爾寨圖貝勒。其子女人民牲畜盡俘獲而還。天聰元年五月奉

命與阿敏貝勒碩託貝勒率正紅旗鑲紅旗鑲藍旗兵征明。攻錦州。圍其城。三年十一月。

太宗親統大兵征明。至北京。前哨瞭見明大同總兵滿桂。宣府總兵侯世祿等。以兵來援。俱至德勝門。代善領白甲擺牙喇兵及蒙古兵前進攻擊。追至隘口。掩殺甚衆。十二月隨

太宗率擺牙喇兵及礮手共五百名往視薊州。代善先發。會有山海關步兵五千來援薊州。距城二里許。與我兵遇。敵兵不及入城。遂立營。環列車盾鎗礮。代善與諸貝勒親率兵衝入。殲其衆。四年二月。明兵部尚書劉之綸率兵至遵化。營於山上。代善奉

率八旗擺牙喇兵往攻之。以兵圍山。招綸降。不從。遂縱兵攻破其營。盡殲之。五年七月。和碩圖額駙固山下牧馬。取草。兵遇明臺軍出。被殺者十人。失馬三十五。駝十。代善與濟爾哈朗貝勒等率

兵三千。以紅衣礮大將軍礮圍攻其臺。焚近臺房屋百餘間。獲駝馬數十。留兵守之。七月。我師征明。圍大凌河城。明遣兵來援。拒城十五里而軍。代善隨。

太宗率滿洲蒙古舊漢兵約二萬。往視之。敵馬步兵合營四面。列大小礮及鳥鎗。我右翼兵衝入敗之。生擒明監軍道張春及武官張洪謨。楊華徵。薛大湖等。時被擒各官見。

太宗皆跪拜。獨張春不跪。

太宗怒。援弓欲射之。代善諫曰。我前此陣獲之人。何嘗

不收養。此人既以死爲貴。奈何殺之以遂其志乎。遂置之。八年五月。隨

太宗率大兵征明。出榆林口。六月。與子薩哈廉貝勒碩託阿格。率兩紅旗及蒙古兵。自喀喇俄保地方入邊。攻得勝堡。正紅旗尼哈里。先登克之。盡殺其兵。城守叅將李全自縊死。鎮江堡民皆逃散。進兵攻大同懷仁縣。未克。駐兵朔州。七月。

太宗遣敦多惠喀木圖諭代善。率兵越馬邑縣。駐劄八月。

太宗親攻大同。代善率兵來會。

太宗出迎。命入營。同坐黃幄中。代善以所獲之物進獻。賜代善宴。宴罷。復出營親送之。天聰十年四月。

太宗建國號大清。改元崇德。大封功臣。首晉封代善爲和碩兄禮親王。十二月。從

太宗征朝鮮。受其降以歸。八年八月。

世祖章皇帝嗣統。郡王阿達禮貝子碩託謀立睿王多爾袞。禮親王代善發其謀。阿達禮。碩託伏誅。阿達禮爲代善孫。碩託代善第二子也。衆咸謂王大義滅親。比烈周公云。順治五年十月壬寅薨。年六十有六。以第七子滿達海襲親王爵。

賜號曰翼。是年定。

賜諸王以下修造園塋銀兩。親王銀五千兩。奉

旨。和碩禮親王與衆不同。特賜銀一萬兩。六年十月立

墓碑紀其功。康熙十年五月。

聖祖仁皇帝特表王功績。追謚曰烈。再建碑曰。自古帝王創業垂統。必懋建本支。以作藩屏。故生隆顯爵。歿錫豐碑。親親賢賢。典甚重也。爾和碩禮親王代善。乃太祖高皇帝次子。

太宗文皇帝兄也。忠純天挺。端格性生。秉志精誠。夙懷英毅。當

太祖高皇帝草昧經綸之時。以本支之親。膺心膂之任。披堅執銳。不避矢石。捐軀裹創。戮力疆場。如征哈達。刁輝。發定葉赫等國。王親率將士。多所斬獲。及攻烏喇國。王陣斬兵。貝勒博克多。大破其軍。嘉乃丕績。因賜名古英巴圖魯。嗣克開原。下鐵嶺。取遼東。肇基立業之隆。王或以智取。或以戰勝。多著奇勲。

太祖高皇帝初登大寶。分封四和碩大貝勒。以王爲大貝勒。

太宗文皇帝平定朝鮮。收服察哈爾等蒙古諸國。攻明郡縣。式廓疆圉。王出則効力戎行。入則宣猷廊廟。無

不殫厥心力。崇德元年。初封宗室王爵。以王爲和碩兄禮親王。

世祖章皇帝入關定鼎。勦除流寇。殄滅福王。統一寰區。王丕襄泰治。翊贊鴻猷。裨益實多。嗚呼。若王者可謂忠冠當時。而功昭後世者矣。乃以疾薨逝。

祖章皇帝時切哀思。每深痛悼。特賜祭葬。勅建豐碑。朕今追念前徽。加諡曰烈。復念勲名既載於盟府。而風烈宜表於阡陌。詳述懋功。顯揚忠義。重勒貞珉。用傳不朽。以示敦睦。懿親之意云爾。子八人。長子克勤。郡王岳託第三子。穎親王薩哈廉。俱自有傳。

原封吳親王滿達海。禮親王代善第七子。天聰二年。大兵征明。圍錦州。滿達海率師往截明杏山糧運於海上。取之。崇德五年。復從大兵圍錦州。擊敗杏山援兵。又以紅衣礮擊敗松山馬兵。六年五月。封輔國公。從肅親王豪格駐劄松山。以本旗兵擊敗明松山兵。錦州城中有兵出城刈草。率右翼將員擊走之。明錦州兵來犯我鑲紅旗營。滿達海助擊敗之。明經畧洪承疇以兵十三萬來援錦州。滿達海以步戰破其三隊。洪承疇兵復來犯。力拒之。人馬俱被創。肅親王豪

格援之曰。爾馬傷矣。此有黃馬。宜速易之。比易馬而明兵大至。乃返擊明兵。殿後而還。明兵復乘天雨來犯。率兵擊却之。明總兵吳三桂率兵據山立營。滿達海領吉爾丹。肅兵往擊。毀其營。十一月。從豫郡王多鐸。赴寧遠。有明兵運粟於海上。率兵擊取之。七年。從鄭親王濟爾哈朗等。征明克塔山。八年。從鄭親王濟爾哈朗。克明中後所。前屯衛俱有功。是年八月。

命掌理都察院事。順治元年。從睿王多爾袞入山海關。擊走流賊。復敗流賊於慶都縣。二年。隨英親王。